


TEZAUUR LITURGIC

21 APRILIE

**ACATISTUL
SF.PREOT
ALEXIE GNEUȘEV
DE LA
BORTSURMANI**



MOSCOVA, 2000



Акафист святому праведному Алексию, Бортсурманскому чудотворцу

Кондак 1

Избранный от Царя сил Господа Иисуса Христа, крепкий победитель врагов невидимых показался еси, предивне Алексие. Во смирении многия труды и подвиги подъял еси, и сего ради велие дерзновение пред Богом стяжав, недугов душевных и телесных целитель явился еси; и ныне Престолу Святыя Троицы в веселии предстоя, от всяких нас бед свободи, зовущих: Радуйся, праведне Алексие, предивный чудотворче.

Икос 1

Ангельскими добродетельми украшенный, небожителем еще на земли уподобился еси, и яко звезда пресветлая в земли Российстей просиял еси. Темже смиренное житие твое воспоминающе и величию подвига твоего дивящися, глаголем ти сицевая: Радуйся, преславный избранниче Божий; Радуйся, подвижниче преизрядный. Радуйся, всею

душею Господа возлюбивый; Радуйся, любвию ко Христу пещь страстей угасивый. Радуйся, покаянием плотския соблазны отринувый; Радуйся, непрестанно в сердце Бога славивый. Радуйся, образе кротости и смирения; Радуйся, усердный ревнителю поста и воздержания. Радуйся, мира духовного умиленный тайнозрителю; Радуйся, жития добродетельного учителю. Радуйся, посылая нам от Господа пречудное поможение; Радуйся, в печалех сущим даруяй скорое утешение. Радуйся, праведне Алексие, предивный чудотворче.

Кондак 2

Видев Господь, яко велию злобу лукавый воздвиже на тя, мирскими соблазны тебе уловити желая, возбрани тому совершиться, и видением Ангела с чашею от пути гибельного отврати тебе, и отселе, отче святе, в непрестанной молитве подвизался еси, добрыми делы людем страждущим послужититтца. Прославляюще молитвенныя подвиги и добродетели твоя, спасающему грешных Богу воспоим, вернии: Аллилуйя.

Икос 2

Разум имея благодатию просвещенный, вся тленная блага ни во чтоже вменил еси, и ревностию по Бозе разжизаем, явил еси себе делателя заповедей Божиих неленостна, отче наш Алексие. Взирающе на славная твоя деяния, восхвалим тя тако: Радуйся, честный сосуде Духа Святого; Радуйся, нрава кроткого богомудрый обладателю. Радуйся, постниче изряднейший Господа ради; Радуйся, молитвенниче теплейший за род наш. Радуйся, наставниче в мори житейском обуреваемым; Радуйся, во всяких обстояниях болезнующим предстателю. Радуйся, скорый заступниче в бедах сущим; Радуйся, щедрый подателю милостыни неимущим. Радуйся, немощствующим благодатная крепосте; Радуйся, скорбных неизживаемая радости. Радуйся, недугов наших целителю: Радуйся, истинного благочестия подвижниче. Радуйся, праведне Алексие, предивный чудотворче.

Кондак 3

Сила Вышняго осени тя, велия искушения от демонов претерпевшаго, и даровася ти еже печаль всякую от душ страждущих

отгоняти. И тако путь живота твоего в служении людем совершая, обителей райских жителем уподобился еси, идеже ныне любовь Богу взываеши: Аллилуйя.

Икос 3

Имеяй сердце горящее любовью ко Господу, едино помышляя еси, како спастися и со Христом в Царствии Небеснем пребыти, постом и добрыми делы, а наипаче молитвою Тому послужити потшался еси, отче Алексие; духом убо ты ведый преподобный Серафим, великаго молитвенника ты провозгласи. Темже славим ты тако: Радуйся, свеще, в молитве к Богу пламенеющая; Радуйся, звездо, сияющая верным. Радуйся, благовонное молитвы кадило; Радуйся, яко тобою Господь прославляется. Радуйся, в миру монашескому жительству прилежавый; Радуйся, гласу Божественному со трепетом внимавай. Радуйся, послушнике Христов совершенный; Радуйся, совершителю службы Божия усердный. Радуйся, образ и подобие Божие в ближнем возлюбивый; Радуйся, веру делами любви утвердивый. Радуйся, чистоты душевныя и телесныя сокровище; Радуйся, милосердия пучино.

Радуйся, праведне Алексие, предивный чудотворче.

Кондак 4

Бурю нападений демонских претерпел еси, егда враг рода человеческого, завистник искони, умысли погубити тя, отче, и многое множество духов нечистых снидошася, да тя устрашат. Ты же, Святым Духом укрепляем, именем Господа нашего Иисуса Христа сим противлялся еси, и заступи тя Сама Пресвятая Богородица со Ангелы, воспевающими: Аллилуйя.

Икос 4

Слышавше святое житие твое, отче праведне, дивляхуся людие добродетелем твоим, и притекаху в весь твою, да ты яве узрят. Отонудуже исходяще, благодариша Господа, яко воздвигает рабов Своих на утешение верным. Мы же с ними воззовем ти: Радуйся, к дому Отца Небеснаго всем сердцем устремивыйся; Радуйся, на высоту безстрастия еще на земли возшедый. Радуйся, веселия Божественнаго в юдоли скорбной сподобивыйся; Радуйся, видения лика Христова и Пречистыя Богоматере удостоенный. Радуйся, сокровища духовная

возлюбивый; Радуйся, плоть духу покоривый. Радуйся, нестяжателю предивный; Радуйся, человеке Божий и доблий воине Христов. Радуйся, Света Невечерняго причастниче; Радуйся, святых подражателю и наследниче. Радуйся, яко велия искушения мужески претерпел еси; Радуйся, яко благодатныя дары преизобильно стяжал еси. Радуйся, праведне Алексие, предивный чудотворче.

Кондак 5

Боготечней звезде подобяся, светозарный путь спасения показующей, во тьме греховней блуждающим путь правый житием твоим показал еси, отче Алексие, да спасеннии тобою вопиют Богу: Аллилуйя.

Икос 5

Видевше людие преславная чудеса, яже благодатию Божиею сотворил еси, вси в скорбех твоего предстательства прошаху, ты же молитвою и кротким вразумлением тех укрепляя еси, сего ради воспеваем ти сицевая: Радуйся, святая Церкве похвало и радование; Радуйся, добродетельми Христа выну прославляяй. Радуйся, дарами благодатными преисполненный; Радуйся,

избранниче Христов, чудесами
 прославленный. Радуйся, Пресвятая
 Богородицы благоговейный почитателю;
 Радуйся, чистоты ума и сердца хранителю.
 Радуйся, покаяния преславный
 проповедниче; Радуйся, благодатную силу
 смирения познавый. Радуйся, Богу и
 ближним нелицемерно служивый; Радуйся,
 пред святым престолом за вся люди слезно
 вздыхавый. Радуйся, отче праведный,
 любовь твою немощи наша покрываяй;
 Радуйся, бедствующим защитниче. Радуйся,
 праведне Алексие, предивный чудотворче.

Кондак 6

Проповедник чудес Божиих явился еси,
 совершенную любовь, яко дар Святаго Духа
 прием, немощи немощных подъял
 еси. Людие же вернии, недугов
 многообразных исцеление приявше,
 благодарственно взывают Богу: Аллилуйя.

Икос 6

Возсия чрез тебе милосердие Божие к
 людем русским, егда двадесять языков на
 Отечество наше ополчишася, грады и веси
 наша пожгоша, святые церкви оскверниша,
 и многи убиша. Ты же, отче, яко и вси

праведницы земли Русския, молился еси ко Господу о спасении Отечества нашего, и возвести Ангел тебе преславную победу воинства православнаго, небесными вои споспешествуема. Темже ублажаем тя сице: Радуйся, святой угодниче Божий, земли Русския красото и славо; Радуйся, христолюбиваго воинства присный ходатаю. Радуйся, державы Российския крепкое забрало; Радуйся, добрым воином ея несокрушимый щите. Радуйся, духовными оружии изрядно вооруженный; Радуйся, покровом Богоматере осененный. Радуйся, воине, со духи злобы ратоборствовавый; Радуйся, именем Христовым тех победивый. Радуйся, яко моление твое милость Божию привлекает; Радуйся, яко заступление твое от велия напасти избавляет. Радуйся, щедрот Божиих сокровище; Радуйся, благоутробия Его изобилие. Радуйся, праведне Алексие, предивный чудотворче.

Кондак 7

Хотяй Всеведец Господь милость грешным явити, смиренней молитве твоей вняти благоволи, и отрока умерша пред всеми людьми воскреси. Мы же, дивящися

таковому твоему дерзновению,
прославльшему тя Господу поем: Аллилуйя.

Икос 7

Новаго и дивнаго чудотворца в земли
Россиистей яви тя Господь, отче Алексие,
верна Господу нашему Иисусу Христу себе
показавша и велия искушения
претерпевша, сего ради великия дары от
Господа прияти сподобился еси, и вся сия
на служение ближним предал еси.
Восхваляюще преславная чудеса твоя,
воспеваем тебе: Радуйся, болящих здравие и
хромых хождение; Радуйся, расслабленных
возставление. Радуйся, из многих бесных
духов нечистых изгнавый; Радуйся, яко
николиже вера постыжена будет,
показавши. Радуйся, людям малым сим, по
заповеди Божией, себе отвергнувся,
служивый; Радуйся, все упование твое на
Господа возложивый. Радуйся, терпение и
надежду на Бога не оставляти паству твою
научавый; Радуйся, верность Тому в
искушениях явити призывавый. Радуйся,
предзревый будущая яко настоящая;
Радуйся, ведевый дальняя яко ближняя.
Радуйся, яко сокрытая яве обличал еси;
Радуйся, яко имя Христово, имже

чудотворил еси, возвеличил еси. Радуйся, праведне Алексие, предивный чудотворче.

Кондак 8

Странное Ангелом и человеком явися, отче праведне, житие твое: быв человек, тело носяй, дух твой, яко безтелесен, в горняя устремил еси, пренебрег вся тленная, в Бога богатея: щедроты милосердия твоего на вся с верою притекающия к тебе излиал еси. Славяще Господа, даровавшего ти благодать сию, воспоем людие: Аллилуйя.

Икос 8

Всего себе на служение Богу управил еси, отче, волю Божию выну творя и умом на небесех пребывая; сего ради духовного мира созерцатель сподобился еси быти, сия же видения тайно письменем предал еси, токмо малое нечто блаженной игумении Марии поведав. Дивящися же сему и устрашающися, с верою воззовем: Радуйся, пречудный лик Христов созерцавый; Радуйся, гласу Божественному пресладкому внимавай. Радуйся, яко стража Церкви восхоте тя Господь нареци; Радуйся, яко овцы Своя словесныя тебе поручи. Радуйся, Пресвятою Богородицею со одра болезни

возставленный; Радуйся, заступления Ея удостоенный. Радуйся, благодатный мир в сердце своем стяжавый; Радуйся, всем страждущим независтно милость твою изливавый. Радуйся, очима телесными ангельское блистание видеый; Радуйся, небесного пения безплотных наслаждавыйся. Радуйся, Царствия Божия на земли предтече; Радуйся, земный Ангеле и небесный человеце. Радуйся, праведне Алексие, предивный чудотворче.

Кондак 9

Всякое естество ангельское радовашеся, егда един от Ангел возвести тебе в алтаре о начале твоего ангельскаго служения. Ты же, отче, житием твоим безплотным подобяся, воспел еси Богу: Аллилуйя.

Икос 9

Ветии многовещаннии умолкают, зряще обилие чудес твоих, Алексие праведне, мы же, неискусен язык имуще, обаче желанием прославить тя побеждаеми, с любовью взываем ти сицевая: Радуйся, Духа Святаго жилище украшенное; Радуйся, от бед и скорбей прибежище благоотишное. Радуйся, отче великий и смиренномудрый; Радуйся,

души людския ко Христу приводяй. Радуйся, слова Божия на сердце твоём начертавый; Радуйся, единыя правды Божия взыскавый. Радуйся, оправдания Божия паче всех тленных благ возлюбивый; Радуйся, в послушании Богу присно пребывавый. Радуйся, сокровенных подвигов ради Христа делателю; Радуйся, тайныя милостыни раздавателю. Радуйся, яко еси бесов добропобедный прогонитель; Радуйся, яко еси добродетелей в чадах твоих насадитель. Радуйся, праведне Алексие, предивный чудотворче.

Кондак 10

Спасти хотя душу и Царствие Небесное наследовати, отче Алексие, велиим подвигом от Господа прощение грехов прияти сподобился еси, темже улучив жизнь вечную, со Ангелы славяши Бога: Аллилуйя.

Икос 10

Стена несокрушимая бысть молитва твоя людем православным, егда же призва тя Господь в обители небесныя, велию скорбию о сиротстве своем сокрушающася, плакашася вся чада твоя духовная горце; обаче и радостию о вечном твоём

блаженстве плач растворяюще, взываху тебе: Радуйся, отче снятый, с нами на земли поживый; Радуйся, сродниче наш, Богу угодивый. Радуйся, молитися о нас пред Престолом Божиим присно обещающий; Радуйся, в животе богоугоднем утверждатися выну нас наставляющий. Радуйся, яко земля, приявшая мощи твоя, освятися; Радуйся, яко тою мнози недужнии исцелишася. Радуйся, по успении твоём с любящими тя духом пребываяй; Радуйся, просящих с верою николиже тщи отвращаяй. Радуйся, истинный пастырю стада Христова; Радуйся, правило жизни благочестивых. Радуйся, заступниче наш благодарованный; Радуйся, наставниче наш богопросвещенный. Радуйся, праведне Алексие, предивный чудотворче.

Кондак 11

Пение всеумиленное прими от нас, отче праведне, пред Престолом Всесвятыя Троицы непрестанно моляся за ны; мы же со Ангелы и всеми святыми радуемся о славе твоей, поем Богу: Аллилуйя.

Икос 11

Светозарному светильнику уподобился еси, отче, сияние святости источая, благодати Духа Святаго исполнен быв. Мы же, мысленными очима на тя взирающе и лучами, от тебе исходящими, согреваемы, любовь к тебе уязвляемся и взываем ти таковая: Радуйся, древним великим отцем в подвизех подражавый: Радуйся, тех ревности по Бозе преисполненный. Радуйся, невещественным огнем осияваемый; Радуйся, на воздухе моливыйся. Радуйся, яко тобою благословися земля окрестная; Радуйся, яко тобою прославися Новград Нижний. Радуйся, страны нашея Российския дивная доброто; Радуйся, Вселенския Церкви цвете благоуханный. Радуйся, крине небесный, на земли процветший; Радуйся, во плоти ангельскою чистотою блиставый. Радуйся, силу правыя веры, человеки обновляющую, всем явивый; Радуйся, славу Христа Человеколюбца показавый. Радуйся, праведне Алексие, предивный чудотворче.

Кондак 12

Благодать от святых мощей твоих обильно изливая, вся недужныя с верою к тебе

притекающія здравы сотворяеши, отче Алексие. Славяще Господа, даровавшаго нам о тебе таковыя милости, хвалебную песнь воспоем Ему: Аллилуйя.

Икос 12

Поюще равноангельное житие твое и преславная чудотворения, Алексие праведне, дивящися добродетелем твоим, ублажаем тя яко дивнаго о нас молитвенника пред Богом, темже со умилением вопием ти: Радуйся, источниче исцелений благодатных; Радуйся, сострадальниче сирых и страждущих. Радуйся, милостивый скорбящим помощниче; Радуйся, наставниче ищущим спасения. Радуйся, Небеснаго Отечества гражданине; Радуйся, Горняго Иерусалима жителю. Радуйся, добродетели ризу светлую стяжавый; Радуйся, радости вечныя удостоенный. Радуйся, яко в обителях райских наслаждаеши; Радуйся, яко Господу в веселии предстоиши. Радуйся, о всех помощи твоея просящих молитвенниче; Радуйся, за вся верныя ко Христу и Богородице ходатаю. Радуйся, праведне Алексие, предивный чудотворче.

Кондак 13

О, прехвальный угодниче Христов и великий чудотворче, праведне отче Алексие, приим малое сие приношение наше, умоли Господа Иисуса Христа даровати нам в покаянии усердие, к деланию заповедей Божиих твердое произволение, в правой вере утверждение, во всех делах наших благое поспешение и по скончании живота нашего души спасение, да с тобою вкупе воспоем Богу: Аллилуйя. Аллилуйя. Аллилуйя.
(Этот кондак читается трижды, затем икос 1 и кондак 1)

Молитва

Святой праведный отче наш Алексие, сохрани и соблюди нас молитвами твоими от искушений диавольских и падений греховных, испроси нам свыше помощь во время уныния и безпомощия нашего, да не преткнемся о камень соблазна, но неуклонно шествуем путем заповедей Христовых, дондеже достигнем оных блаженных обителей райских, идеже ты ныне водворяешься и веселишися. И яко предумершую душу отрока молитвою твоею воскресил еси, тако и душам нашим испроси у Господа к усердию воззвание, да

избежавше молитвами твоими мытарств
воздушных и власти лютаго миродержца,
унаследуем Царство Небесное и прославим
великолепое Имя Отца, и Сына, и Святаго
Духа во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО